

# Filimoni

## tò Pòlò andí bhàruwà

### Yàrí bhàruwà ò ì nòtù ádrùngbàle dhu tí dhu

Filimoni, Kòlòsayì tó kigò ò ale níí Pòlò t'òdhìnà. Ní Pòlò unò Ádrùngbàle Yèsù dǎ róte Ídzi Màkùrù kà tò, kà ràdù ndi Ádrùngbàle à'ù. Ndi Filimoni íí Ònèsímò tí kátina atdí pbìndà ino nà. Ní ndi Ònèsímò náakù pbìndà ádrùngbàle bhà idzá rò, ndàrà àhu Rómà tó kigò ò. Ní ányì, abádhí àdù òwu 'òtù Pòlò nà imbi ò, kàrádi ró. Ní, ndi ndúnò Ídzi Màkùrù Ònèsímò tò, rà'ù Yèsù dhu-dzidǎ, Pòlò adù kòzè ndàdu pbìndà ádrùngbàle Filimoni-f'ò. Wò dhu-okú dǎ rò ní ndi, Pòlò andí yàrí bhàruwà Filimoni tò, mbèmbè azà kumi dóná atdí nà ató údà Yèsù ka kùgù dhu-dzidǎ rórò. Kándí ka ndítde ka ìtde tí ònà, ndíí dhu nùbà tí Ònèsímò tò, ndàdù kàkò mbèyi, inzi ní pbìndà ino-akpà kèlè bhèyi, pbétù òdhìnà nyú bhèyi, ndirò addòna bhèyi Krístò-nyutsi.

### Bhàruwà-nyitì ka kóhù tí dhu

- Pòlò mà Tímòtewù màná rí Filimoni òvì dhu (1-3).
- Pòlò rí òtsò àbhù Kàgàwà tò Filimoni bhà àzè mà, kàbhà a'uta màná-okú dǎ rò dhu (4-7).
- Pòlò rí ndìtsò Filimoni rǎ ndíí Ònèsímò nakò tí dhu (8-22).
- Bhàruwà ríku dóná rò ovità (23-25).

### Pòlò mà rí Filimoni mà òvì dhu

(2Tì 1.3-5; 3 Yùw 1.2,6)

**1** Yàrí bhàruwà nàndí ní ima Pòlò, yà òsò ka kósò ma Yèsù Krístò-okú dǎ rò ale, ndirò ní àlè t'ádòná Tímòtewù. Mǎ màndí ka indù adòkà Filimoni, yà atdíidǎ mǎ mózè nyì, ndirò kasu tó òdhìkà tíró. **2** Ndirò mǎ màndí ka àlè tó dadánà Àpiyà mà, Àrkipò, yà ìla ùgye arí atdíkpà àlè màná ale mà, ndirò kǎkò pbùkù idzá ì nùndu \*kànìsà ò bhà màná tò. **3** Àlè t'Ábanà Kàgàwà mà, àlè tó Ádrùngbàle Yèsù Krístò màná náká 'àsò nyì, 'adù nyàbhu nyòkò màrùngà ò.

### Pòlò rí òtsò àbhù Kàgàwà tò Filimoni bhà àzè mà, kàbhà a'uta màná-okú dǎ rò dhu

**4** Adǎ Filimoni, ma marí òtsò àbhù bilínganà pbàkà Kàgàwà tò, pbàkà ìtsòta ò ma mí nyirè rò. **5** Obhó tí, ma mìrì wà indrù rí dhu àwě Ádrùngbàle

Yèsù nyi nyá'ù ní a'uta dǎ dhu, ndirò nyi nyóze Kàgàwà bhà ale kóró dhu dǎ dhu. <sup>6</sup>Ní, ma mí mitsò Kàgàwà rǎ, ndíní yà atdíkpá àlě kǎí nà a'uta nííí tí àkǎkǎ itse òdhì rádù a'uta tí, nyadù kóró ídzìnga, yà àlě karíí nà, Krístò mànà àlě tó ungbòta-otù ǎ núnì. <sup>7</sup>Adòdú, pbùkù àzè níka idhèdu atdídǎ, ndàdù afídu òpè, nyi nyábhù Kàgàwà bhà ale-afí ròtsi òbì nídhuní.

**Pòlò rí ndìtsò Filimoni rǎ ndíní Ònèsímò nakò tí dhu**

(1Kò 13.4-7; Kòl 4.7-9)

<sup>8</sup>Nírò, Yèsù Krístò-nyutsi, ma míí ìmbǎ tsùdu ùtò rádù ìnzì mǎyǎ dhu indù nyi nyàkànà nyonzì dhu dǎ atdí dhu nà màtí. <sup>9</sup>Pbétù, ma mòzè monzì atdí dhu funú àlě tó àzè-okú dò rò. Ima nyú Pòlò, ima ní mǎlà-akpà, ndirò, kòmbí ma míí Yèsù Krístò-okú dò rò ka kósò ma ró. <sup>10</sup>Ní, ma mìtdè nyi ìtdè tí pbàńngba Ònèsímò-okú dò rò, yà Yèsù Krístò ndì ndá'ù fudú dhu-otù ǎ óngò idhùdu tí, inè ma míí imbi-dzà ǎ rórò. <sup>11</sup>Angyi, àbadhi nyú nííí mbǎ indù ndì ndónzina atdí dhu nà màtí, pbétù kòmbí kà rí dhu ònzi ònzi indù, ndirò idù màtí átò.

<sup>12</sup>Kòmbí, ma màdu wà ka tìnu ò, ndirò àbadhi ní afídu-mbi nyú. <sup>13</sup>Ma màmbènà òzèna dhu ní Ònèsímò ràdi tidú, ndíní ara tí dzùnàdu ònzì rǎ indú ngari ǎ, yà àdì ma màdì imbi-dzà ò ídzì Màkùrù-okú dò rò ònà kàsùmì ǎ. <sup>14</sup>Pbétù, ma mòzèna nzá mǎnzì atdí dhu mà, inzà nyi nyà'ù rórò, akye dhu arana ìí ùtù tí ma mí nyutù nyonzì ídzìnga idù dhu tí nǎ. Ma màmbènà òzèna dhu ní, nyonzì ka afínu nyú ò rò àhù rórò.

<sup>15</sup>Ngàtsi ní, pbǎní nzí ndi dhu-okú dò rò nga ndi, Ònèsímò mà úbhǎ ì inyi mànà ákě kàsùmì tí nǎ, ndíní nyí nyongó tí òko tdítǎ atdíkpá ndì mànà bìlìnganà. <sup>16</sup>Obhó tí, kòmbí ka ní nzí ìno kèlě, pbétù ròsè ìno dǎnǎ, kǒngò wà yà atdídǎ àlě kóze àlě t'ádònà tí. Ima, ma mòzè ka atdídǎ. Ní inyi, nyi nyí kòze atdídǎ ròsè, ka ní ìndrù nyú, ndirò ka ní Ádrùngbǎle Yèsù bhà ale átò àlě'ì bhèyi nídhuní.

<sup>17</sup>Nírò, àdhàdhì nyi nyarí mǎzù òdhìnu tí dhu bhèyi, nyi nyàkǎ nyako ka átò, àdhàdhì nyi nyàmbènà makǎ, ima nyú tíró dhu bhèyi. <sup>18</sup>Dhu apé ìí kǎfǎ dhu ònzìnú dhu tí, ndirò ngàtsi ní, dhu apé ìí kǎríí pbùkù wànzà nà màtí dhu tí, ní àndí ndi pbùkù wànzà dùdú. <sup>19</sup>Ima Pòlò, ma màndí yàrí dhu òtsúdu nyú ní: ma mí ndi kùbhò indù. Ma mòzè nzá misè dhu dùnú mati, nyi rǎrǎí átò pbàkà wànzà nà. Ndi wànzà ní pbùkù ìpìrǒnga. <sup>20</sup>Obhó tí, adòdú, ònzi dzùnàdu wòrí otu ǎ Ádrùngbǎle-okú dò rò, nyabhù afídu ròtsi òbì.

<sup>21</sup>Indù ma mí dhu àndí rò, ma mà'ù wà dhu, ìri nyi rǎrǎ ma múnɔna dhu ìri, ndirò nyi rǎrǎ ndi dhu ònzonzì ròsè wò ma màndò dhu dǎnǎ màtí. <sup>22</sup>Ndirò, atdíkpá wòrí dhu mànà, òbhòlo nyòbhòlo idhò tó ngari idù. Obhó tí, ma mà'ù wà dhu, ka rǎrǎ madù àdù tdítǎ fùrǎbvù, fùkù itsòta-okú dò rò.

**Bhàrɔwà rĩku dóná rò ovita**

<sup>23</sup>Èpafrà nóvì nyi. Ka ní ɔdhídu yà atdíkpá ka kúsò mǎ mànà, Yěsù Krístò-okú dò rò. <sup>24</sup>Ndirò ɔdhídu, yà atdíkpá mǎ marí kasu ònzi mànà Mǎrkò mà, Àsìtarikò mà, Děmà mà, Lukà mànà, nóvì nyi.

<sup>25</sup>Àlě tó Ádrùngbǎle Yěsù Krístò àkǎ ndàso nyí.